

# 1 Tesaronika

## Pauru okusiwa ypy Tesaronika wānà kō pè maekwerà

### Imovyvya

Aã kareta Janejare'e 'Āg omotekokuwa Pauru tokusiwa Tesaronika wānà kō pè maekwerà. Pauru oo taa taa rupi Jesu rekoa rè poromotekokuwa remē, Tesaronika taa kyty ve oo. A'e pè Juteu rōwā mǎe kō omotekokuwa Janejare'e ayvu rè iko. A'e kō ojirovija Jesu rè āmē ky'y (J.K.R. 17.1-10). Ajamā'ē Juteu kō ojikō'ō Pauru rè, Juteu rōwā mǎe kō omotekokuwa rewarà mō. Ajawyi Pauru nopyta pukui a'e taa pè upa. Ojisyry oo. Pereja taa kyty rā'ī oo. Ajaire Korītu taa kyty oo. A'e pè Jesu koty rewarà Tesaronika taa wānà kō rekoa ojenu ijupe. Timoteu oo esa kō remē, ekoa kō rè omā'ē. Ajaire omome'u Pauru pè. "Ojimokasi jē ojirovija Tesaronika wānà kō Jesu rè", e'i. "Poroauvay teve kupa ipi", e'i. Ajawyi Pauru kareta okusiwa imono ijupe kō, āmē ywesō imokasia kō rōmō. Okusiwa ijupe kō remē, "eretārāgwerà kō" e'i ijupe kō. Manyvo ekoiawerà rè omoja'aoka kōtā okareta rupi. "Kāramō Jesu uu mijē remē, ojirovija ee maekwerà kō pirujē werutà oupi", e'i teve kareta rupi imono ijupe kō (1Tes. 4.14). Tesaronika wānà kō ojimomoriĵau upa rewarà mō, aã kareta rupi Pauru omotekokuwa kō imokasi kō jē toiko kupa.

### Pauru ojikuwa Tesaronika wānà kō pè

**1** <sup>1</sup>Ije Pauru. Aã kareta akusiwa ajupa pejē. Sirasi<sup>a</sup> ve epyri tui upa akusiwa kareta ajupa remē. Āmō, Timoteu epyri tui ve upa.

Aã kareta akusiwa imonooka pejē, Tesaronika taa wānà kō pè. Janejare'e, Janeruu e'e koty rewarà kō atyry tē pejē. Janerōvijā Jesu Kiristu koty rewarà kō atyry teve pejē.

Janejare'e ikō tapenereko katu okatuaya rupi nē. Tapepy'amopiryvypy katu teve ikō nē.

---

<sup>a</sup> 1.1 Siuvanō teve eu ijupe.

**“Pejikuwa katu Jesu koty rewarà kō rōmō”, e'i mā'ē**

<sup>2</sup> [Ojenu penewarà ike ije, kee e'i oreupe kupa remē: “A'e kō ivo katu tē ekoi”, e'i omojenu penewarà oreupe. Ajawyi orokuwa penewarà.] Ajawyi oroporegeta peupewarà mō Janejare'e pè ipi. <sup>3</sup> Kee oro'e ijupe peupewarà mō ipi: “Ojirovija katu nere kupa ipi”, oro'e. “Nerau katu kupa ipi. Ajawyi poropātavō gatu kupa ipi”, oro'e. “[Nopi neayvu mojenua wyi kupa ipi. Ojimokasiay wete imojenua rē kupa.] Okuwa katu Janerōvijā Jesu Kiristu ovāe tarà mijē kāramō mā'ē kupa. Ajawyi nopoi'āi nere ojirovija mā'ē wyi kupa ipi”, oro'e Janejare'e pè peupewarà mō ipi.

<sup>4</sup> Aje ywete Janejare'e remiau kō tē pejē, erētārāgwerà kō. Pepyteporopa wākarāgwerà kō rōmō penereko. <sup>5</sup> Janejare'e ayvu e'eay Jesu rewarà oromojenu ypy pejē remeve itōkō peenu katu peiko. Aje ywete Jesu rekoa oromojenu maekwerà. Pekuwa oreayvu rupi rōwā poromotekokuwa oroiko ipi. Janejare'e kasia rupi tē poromotekokuwa oroiko ipi. I'Āg kasia rupi tē poromotekokuwa oroiko ipi. Pepyterà rupi oroiko remē itōkō, Janejare'e ayvu rupi katu oroiko ipi. Norojavyi 'ete itōkō Janejare'e rekoa pepyri oroiko remē. A'evo oroiko remē, pekuwapa manyvo tekoua ky'y. A'e rupi jēsi peiko ky'y. <sup>6</sup> Ajawyi āwitō Janejare'e ayvu rupi katu oroiko, āwīvo ve pejē peiko āmē ky'y. Āwitō Janerōvijā ywete Uu ayvu rupi katu ekoi ipi, werovija katu Uu, āwīvo ve pejē peiko ky'y. Ajawyi penory katu peiko ky'y. “Awyje Jesu rekoa rupi tijaiko ky'y”, pejē rewarà mō penory peiko. Janejare'e 'Āg tē pemoryoka. Ajawyi, āmō kō pemoai epe remē, “Ānī, norojivy'āi mijē oreaiwererā kyty ky'y”, pejē ijupe kō ipi. Penory jē Jesu ayvu rupi peiko ky'y.<sup>b</sup> <sup>7-8</sup> Ajawyi poromotekokuwa māe kō rōmō peiko ky'y. Janejare'e ayvu rē poromotekokuwa māe kō rōmō peiko ky'y. Ajawyi Masetonia vvy wānà kō pè penewarà ojenu remē, “Jane ve Jesu remīgwai kō rōmō jaikotā”, e'i āmē kupa. Āmō, Akaja vvy wānà kō ve aepo e'i. Pevo jē ekoi kupa ky'y. Āmō vvy vvy wānà kō ve a'evo ekoi. Ajawyi, “Aje ywete pō Janejare'e rē ojirovija jē kupa?” noro'ei peupewarà mō ky'y, aje pejikuwapa rewarà mō. <sup>9</sup> A'e taa taa wānà kō tē manyvo peiko mā'ē omojenu oreupe ipi. Kee e'i kupa:

– Tesaronika taa pè peo ypy Janejare'e ayvu e'eay mojenu remē itōkō penereko katuay kupa! Janejare'e ayvu e'eay wenu kupa remē itōkō opoi ojarà rā'āga jimoātāgwerà kō wyi kupa ky'y, e'i. Janejare'e oiko teāmā mā'ē tē omoe'e kupa ky'y. Ijayvu rupi katu ekoi kupa ipi, e'i. <sup>10</sup> Aje Janejare'e Ra'yry Jesu rē ojirovija katu kupa ipi. Janerereko katu jē janerereko jimomorijau wasua wyi mā'ē rē ojirovija kupa. Janejare'e omomoera eraa wena kyty yva pupe maekwerà rē ojirovija kupa. “Aje

<sup>b</sup> 1.6 J.K.R. 17.5-9

Jesu uu tarà mijê”, e'i Tesaronika wānà kō. Ivāea wārō jê kupa ipi, ikoty rewarà kō rōmō, e'i peupewarà mō oreupe kupa.

Ajawyi orokuwa penewarà.

### Pauru omome'u oposikoawerà

**2** <sup>1-2</sup>Norooive penena kyty oreposiko pepytery pè remē itōkō Piripu taa pè rāṭ oroposiko oroiko. A'e pè oroiko remē itōkō, oreayvu noerovija tari māe kō oremojaiweay orerereko. Ijayvu ai wete itōkō oreupe kupa, Jesu ayvu e'ey teipe oromojenu remē. Ajamāē noropi imojenua wyi. Oromojenu jenu jê erokwa. Janejare'e oremokasi jê rewarà mō a'evō oroiko. A'evō mijê penena pè. [Noerovijari māe kō oremojaiwe ipe remē itōkō oromojenu jê itōkō pejê āmē. Noropoi ijayvu mojenua wyi penena pè oroiko.] Ajawyi tē mōāārōwā pepyterà rupiwarà kō ojirovija ee ky'y. Aje ywete noroposiko pānēi pene.<sup>c</sup>

<sup>3</sup>Aje, Jesu ayvukwerà mojenū tē orojo pekoty. Orewari rōmō rōwā orojo. Pewāivī'y rewarà mō rōwā teve orojo. “Ja'e si a'e kyty jajimoe'eoka ijupe kō”, noro'ei teve. A'evō rōwā oroiko. Ayvu e'ey mojenua mō kōrijō tē orojo pekoty. <sup>4</sup>Janejare'e tē oremuroka toporomotekokuwa ayvu e'ey rē. Ajawyi ijayvu e'ey tē oromome'u pejē. Jane kō morya mō rōwā poromotekokuwa ipi. Aje Janejare'e morya rōmō tē oroiko. Janejare'e okuwa a'evō oroiko ipi, janepy'a pewarà okuwa māē tē a'e rewarà mō.

<sup>5</sup>Poromory rā'āga rōwā itōkō pepyterà rupi oroiko remē ipi. Aje ywete poromory oroiko ipi. “Mire'ey kupa”, noro'e teywetei peupewarà mō pemorya rōmō oroiko ipi. Pekuwapa a'evō rōwā oroiko māē. Mōrijō tekoua māē rupi rōwā poromotekokuwa oroiko ipi. Janejare'e ayvu pejavy tite remē, “Aje pejavy”, oro'e itōkō pejē ipi. Janejare'e okuwa a'evō oroiko māē. <sup>6</sup>Kee noro'ei teve pepyterà rupi oroiko remē: “Jane kō oremoe'e kuwasi!” noro'ei ipi. A'evō ve āmō kō pyterà rupi oroposiko remē, aepe noro'ei. Jimoe'ea rē rōwā oroposiko ipi.

Kiristu remimonokwerà kō rōmō oroposiko pepyterà rupi oroiko. [Penōvijā kō rōmō teipe oroiko.] Ajamāē norojimomojyi pekoty oroiko. “Karakuri tapeme'e oreupe orema'e kō repy rōmō”, noro'ei itōkō peupe. Oro'e kuwa mijā. <sup>7</sup>Ajamāē ikatusa rupi kōrijō poroereko ipi. Āwitō wāivī omemyry wereko katu, āwīvo tē oroiko ipi. <sup>8</sup>“Orojime'ē kuwasi ipo kō pè”, oro'e tesō peupewarà mō, Jesu rekoa katu oromome'u pejē remē. Kō'ē jawe jawe itōkō poropātavō ipi. Poroauvay rewarà mō a'evō poroereko ipi.

<sup>9</sup>Kee a'e teve pejē, tapeja'a jē ee, eretārāgwerà kō. Mape remē norerako'i pene orema'e rā kō rē, Jesu rekoa katu rē poromotekokuwa penena pè remē. Oroposiko ywete itōkō orema'e rā kō repy rōmō ipi.<sup>d</sup> Aryvo oroposiko ipi. Pya rupi teve. “Tiwaype e'ā Tesaronika wānà kō pè”, oro'e rewarà mō a'evō oroiko ipi.

<sup>c</sup> 2.1-2 J.K.R. 16.19-24; 17.1-9    <sup>d</sup> 2.9 Tetā ropa reinōa rē oposiko maevo. J.K.R. 18.3

<sup>10</sup>Ivo katuay itōkō oroiko pepyterà rupi Jesu rē orojirovija mǎe kō rōmō. Ivo katu teve poroereko oroposiko pepyryvo remē. Norojavyi pe'ĩ tekoua katu mō ipi. Kō'ē jawe jawe pemā'ē orere, a'evo oroiko remē. Ajawyi pekuwa āwīvo oroiko mā'ē. Janejare'e ve okuwa katu orerewarà. <sup>11</sup>Āwītō janeruu janerereko katu ipi, āwīvo itōkō poroereko katu ipi. <sup>12</sup>Poropy'amokasi jē itōkō poroereko ipi. "Janejare'e remimota rupi jēsi tapeiko", oro'e itōkō pejē. "Pejo emoēoka pe'arà kyty pekupa", e'ipa Janejare'e janeupe. "Poroeraatà erena ikatuay wete mā'ē kyty epyri tapeiko karuaru", e'ipa jane. A'evoa rē itōkō poropy'amokasi poroereko ipi, pepyterà rupi oroiko remē.

<sup>13</sup>Āmō, Janejare'e ayvu e'ey oromojenu peupe remē itōkō, pejirovija katu Jesu rē ky'y. Kee pejē āmē enu: "Jane kō tekokuwaa rōwā oroenu. Janejare'e remikuwa tē oroenu", pejē itōkō enu ipi. Aje ywete Janejare'e remikuwa tē oromojenu. A'evoa pekuwa katu, Janejare'e pemotekokuwa wayvu e'ey rē rewarà mō. Ajawyi oroporegeta Janejare'e pē remē, "Nekatuay wete", oro'e peupewarà mō ipi.

<sup>14</sup>Kee a'e teve pejē, eretārāgwerà kō. Tapeāgyo e'ā ikō penetārā kō pemomoriĵau ipe remē nē. Pejē rōmō'ite rōwā a'evo peiko. Juteja yvy wānà kō ve a'evo ekoi. Etārā kō omomoriĵau kō teve, Kiristu Jesu rē ojirovija kupa rewarà mō.<sup>e</sup> <sup>15</sup>Karamoe remeve a'evo Juteu kō ekoi. Janejare'e ayvu omojenu maekwerà kō wapisi pisi jē iko kupa ipi. Eruparà kō rōmō ijeapyrerà kō age'e remē a'evo ekoi. Janerōvijā Jesu ve tesō ojuka kupa. Ajawyi Janejare'e naory ekojēi tesō ee kō omājā ky'y. Āmō, pirujē jane kō rē ojikō'ō kupa.<sup>f</sup> <sup>16</sup>A'e kō nopotai Janejare'e ayvu e'ey oromojenu Juteu rōwā mǎe kō pē, āwisō Janejare'e toereko katu kō teve ereko ipi. Ajawyi tē opota ipe oremomoioka kupa mijā. Āwīvo remē ywesō waperō perō jētā waiwererà wee āmē kupa, āwisō Janejare'e pē ojimomoriĵauvayokatà tē tesō āmē kupa ky'y.

### "Apota aa mijē penesa", e'i mǎē

<sup>17</sup>Eretārā kō, pepyterà rupi oroiko remē itōkō a'e kō oremojava oremono penena pe wyi.<sup>g</sup> A'evo paireve poroekaray ipi. Oroja'a ywete jē pene. Kō'ē jawe jawe orojipy'amogeta jē pene, ke'irōwā ipe oroiko remē.

– Manyvotà pō Tesaronika wānà kō sireko esa mijē? oro'e tite ojiupe ipi.

<sup>18</sup>Oroo tarepe penesa mijā. Āmō 'ary pē ije rōmō'ite aa tarepe mijā. Āmō remē aa taray ipe ipi mijā. Ajamā'ē Satanasi noremonookari ipi.

<sup>19</sup>Ajawyi tē naai penesa ipi. Poroekaray ipe ajamā'ē. Oremoryarà kō tē pejē, Jesu rekoa rupi katu peiko ipi rewarà mō. Penewarà mō tē oromoe'e

<sup>e</sup> 2.14 J.K.R. 17.5    <sup>f</sup> 2.15 J.K.R. 9.23,29; 13.45,50; 14.2,5,19; 17.5,13; 18.12

<sup>g</sup> 2.17 J.K.R. 17.10

ywetetà Janerōvijā Jesu, uu mijē ojikuwa Jōvijā wasu rōmō remē. Kee oro'età peupewarà mō ijupe:

– Emā'ē Tesaronika taa wānà kō rè! Nerekoa rupi katu ekoi kupa ipi! Aje noroposiko pānēi ipyterà kō rupi oroiko. Ajawyi oreroryvay oroiko, oro'età Janejare'e pē āmē.

<sup>20</sup>Aje ywete, penewarà mō tē oreroryvay oroiko ipi. Orojimoe'e pene oroiko ipi.

**3** <sup>1-2</sup>Jypy remē orojipy'amopirai pene, penewarà norokuwai mijā rewarà mō. [Sirasi. Āmō, Timoteu. Āmō, ije. Mokojejō a'evo oroiko mā'ē ore.] Werywete oretekorā a'evoa rè. Ajaate Timoteu oromonooka pekoty penesa ky'y. Ore āmē oropyta ike Atena taa pē.<sup>h</sup> Timoteu kōrijō tē oo. Oreretārā vo mā'ē tē Timoteu. A'e oposiko oreveve, Janejare'e ayvu e'ey Kiristu rewarà mojenuarà rōmō. A'e oromono pekoty remē, kee oro'e imono:

– Emokasi kō jē ikō Jesu rè tojirovija jē kupa nē. Emotekokuwa kō teve ikō ekoa kō rè nē, oro'e ijupe. <sup>3</sup>Āmē tē noity ywe'e tite'āi Kiristu rè ojirovija kupa mā'ē, noerovijai māe kō omomorijau kō ipe remē, oro'e ijupe.

Jajimomorijau teāmā Jesu koty rewarà kō rōmō jaiko ipi. Janejare'e remikuwa rupi tē a'evo jaiko. Pekuwa a'evoa. <sup>4</sup>Pepytery pē oroiko ipe remē itōkō, kee oro'e py'yi amātejē pejē ipi:

– Jesu rè nojirovijari māe kō janemojaiwe ipetā ajaire, oro'epa teāmā pejē.

Aekwerà rupi katu tē janemojaiwe ipe kupa ky'y. A'evoa pekuwapa. <sup>5</sup>Ajawyi tē Timoteu amonooka pekoty ky'y. Ajimonyi tesō pene. Kee a'e eupe mijā: Ojirovija jē sipō Jesu rè kupa? a'e eupe. Opoi tite sipōkō iwiyi kupa, ājāgai rōvijā poro'āā ojimokasi ijupe kō remē? a'e eupe. A'evo sō kupa remē, nikatu'āi āmē. Manyvo jaa rōmō rōwā kuwa oreposikoawerā āmē! a'e ajipy'amogeta mijā.

### Timoteu remimojenuwerà penewarà

<sup>6</sup>Ajaire Timoteu ojivy uu pekoty wyi remē,<sup>i</sup> penekokwerà omome'u erovāe oreupe. Āmē tē oreroryvay, kee oroenu rewarà mō:

– Ojirovija katu jē Janejare'e rè kupa. Ojiauvay jē ojeeve kupa, e'i toroenu rewarà mō.

Kee e'i teve Timoteu ore penewarà mō:

– “Manyvo remē pō Pauru kō uu tarà mijē oreresā?” e'i pejē kupa, e'i. “Ikatuay orepyterà rupi ekoi kupa mijā”, e'i pejē kupa. Oja'a katu jē pene kupa. Āwitō pejē peekaray kō, āwīvo ve penekaray ve kupa, e'i Timoteu ore penewarà mō.

<sup>h</sup> 3.1-2 J.K.R. 17.15 i 3.6 J.K.R. 18.5

[Ãmẽ aepe oroenu remẽ, orepiryvypy katu ky'y.] <sup>7</sup>Ajawyi kee a'e pejë, eretãrãgwerà kô. Orojimomorijau ipe remẽ, orojipy'amokasi jẽ ipi. Pene orojipy'amogeta ywete remẽ, orojimokasi ywete ãmẽ ipi. <sup>8</sup>Norojipy'amopirai pene ãmẽ oroiko ky'y, pejimokasi jẽ Janerõvijã ywete rẽ pejirovija rewarà mô. Orepiryvypy katu ky'y. <sup>9</sup>Ajawyi oromoe'e ywete Janejare'e penewarà mô ipi. Pene oreroryvaya oromome'u ijupe ipi. Ajawyi oromoe'e py'yi. <sup>10</sup>Orojimokasiay wete Janejare'e pẽ oroporegeta. Kee oro'e oroporegeta ijupe:

– Oremonooka mijẽ rejupa, toroo esa kô, oro'e. Toromotekokuwa kô imokasi kô, oro'e. ãmẽ ywesô ojimokasità nere ojirovija ãmẽ kupa ky'y, oro'e py'yi Janejare'e pẽ.

Aryvo rupi, pya rupi aepe oro'e imogeta. <sup>11</sup>Aepe oro'e jẽ Janeruwasu pẽ, tomowaype e'ã oreoa rã pekoty oreupe. Janerõvijã Jesu pẽ aepe oro'e teve. <sup>12</sup>Kee oro'e teve peupewarà mô:

– Emokasi kô ikô tojiauvay jẽ iko nekasia rupi kupa nẽ, oro'e ijupe. Age'e ywesô a'evooka kô jẽ ereko, oro'e ijupe. Awitô oraouvay kô, awĩvo toporoouvay kupa, awisô pirujẽ jane kô emiau kô rômô toiko, oro'e ijupe. <sup>13</sup>Ãmô, emokasi kô ywete toiko nekoty rewarà kô rômô iko kupa ipi, oro'e pejë. A'evo remẽ kee eretã ijupe kô, Janerõvijã Jesu uu mijẽ pirujẽ oupewarà kô reve remẽ: “Aje, epy'a rupi katuwarà kô tẽ pejë”, eretã ijupe kô. “Ivo katu mãẽ rômô tẽ pejë. Naikoi ivo e'ãa pene Janejare'e rovake ky'y”, eretã ijupe kô, oro'e Janeruwasu pẽ peupewarà mô.

### Tekoua Janejare'e ory ee mãẽ rewarà

**4** <sup>1-2</sup>Kee a'e tarã mijẽ, eretãrãgwerà kô. Pekuwapa manyvo tijaiko Janejare'e morya rômô. Poromotekokuwapa itôkô a'evoa rẽ, pepyterã rupi oroiko remẽ. Janerõvijã Jesu ayvu rupi tẽ poromotekokuwa mãẽ pekuwapa. Aje ywete upi jẽ peiko. Ajamãẽ kee oro'e jẽ pejë oroiko. Age'e ywesô si a'evo ywete tapeiko, oro'e pejë.

<sup>3-4</sup>Janejare'e opota ivo katu tapeiko, okoty rewarà kô rômô. Nopotai nivoi tekoua rupi peiko. ãmô, nopotai pejimomy'aa rupi peiko. A'evoa wyi opota tapejireko katu, pirujẽ. ãmô, penerekwarã kô tapereko katu ikenẽ. Tapepy'aory katu ikô ojeeve peiko nẽ. Janejare'e orytã ãmẽ pene. <sup>5</sup>Naory'ãi pene pejitupi ãmô wãivĩ kô rẽ peiko remẽ ipi. Janejare'e nokuwai mãe kô tẽ a'evo ekoi ipi. A'evoa rupi tapeiko e'ã ky'y. <sup>6</sup>Ãmô, kee a'e pejë. Tapemoai e'ã pevoarã kô ipi. Tapemoripe kô e'ã ipi. A'e rẽ itôkô oreayvukasipa pejë, jypy remeve. Apijarã kô omomorijautã Janerõvijã ywete kãramô, oro'epa itôkô pejë. <sup>7</sup>Awĩvoa rômô rãwã Janejare'e janemuu okoty. Aje ivo katu mãe kô rômô tẽ janemuu mijã, okoty rewarã kô rômô tẽ. <sup>8</sup>A'evoa rẽ kee a'e pejë. Ava mô sô ojimoape kôrijõ eayvu renu tare'ã remẽ, Janejare'e ayvu renu tare'ã tẽ a'evo ywe'e titetã. Janejare'e ayvu wyi tesi ojipe'apa ywe'e titetã ãmẽ ky'y. O'Ãg ome'ẽ jane kô pẽ mãẽ wyi tẽ ojipe'a ywe'e titetã ãmẽ ky'y.

<sup>9</sup>Ajamã'ë noroporegeta mijë'ai a'evoa rè, pekuwapa a'evoa rewarà mō. Ivopa peiko, pejiauvay mǎe kō rōmō. Janejare'e tē pemotekokuwapa a'evoa rè tapeiko. <sup>10</sup>Aje ywete pejiauvay peiko ky'y. Pirujē Jesu koty rewarà kō Masetonia vyv wānà kō peauvay ereko kō ipi. Ajamã'ë poromokasi jētà, age'e ywesō tapejiauvay peiko. <sup>11</sup>Āmō, kee oro'ēpa teve pejē mǎ'ë. Torya rupi katu tapeiko. Āmō, tapemǎ'ë tē ojee peiko. Āmō, tapeposiko katu ikō peiko ipi nē. <sup>12</sup>Āmē tē Jesu noerovijaive mǎe kō pemoe'tà, ikatuay ipyterà kō rupi peiko rewarà mō. Āmē tē napenako'i'āi joe, oro'ēpa teve pejē.

### Jesu vāea rǎ rewarà

<sup>13</sup>Āmō, kee a'e jētà pejē, eretārāgwerà kō. Oropota aje ywete mǎ'ë tapekuwa okājā maekwerà kō rewarà. [Jesu uu mijē remē, pemǎ'ë tarà mijē ojee.] Ajawyi tapeāgyo e'ā ee kō. Jesu rè nojirovijari mǎe kō ijāgyoay ywete wetārā kājāma rè ipi. Manyvo noereko'āi āmē kupa ky'y. Ajawyi ijāgyoay wete kupa. Pejē āmē tapenory jē peiko, peāgyo rǎ'i epe peiko remē. [“Kāramō teipō jamǎ'ë tarà mijē ojee”, tapejē kōrijō āmē.] Okājāma ipe kupa remē, oke mǎ'ë vo tē ajamǎ'ë kupa, ajawyi. <sup>14</sup>Kee rewarà mō. Aje Jesu omānō maire, Janejare'e omomoera mijē imopō'ā. Āwīvo ve aje ywete okājā mǎe kō omomoera tarà mijē imopō'ā. Kāramō Jesu uu mijē remē, ojirovija ee maekwerà kō pirujē werutà oupi. A'evō mǎ'ë pē “aje ywete” taoty.

<sup>15</sup>Janerōvijā jypy remē oremotekokuwapa ovāea 'arà rǎ rewarà rè. Kee e'ipa: “Nokājāive mǎe kō ypy rōwā ootà erōvaisī okājāma maekwerà kō wyi, yva pē”, e'i. <sup>16</sup>Keetà Janerōvijā ywete uu yva pe wyi remē. Iporegeta ojenutà, ijayvukasia. Wayvo ojenutà. Āmō, emīgwai yvapewarà kō rōvijā poregeta ojenu tevetà. Jimi'a puku ojenu tevetà, Janejare'e jimi'a puku. A'evoa remeve Janerōvijā ywete uutà ky'y. Āmē sōsi Kiristu koty rewarà kō okājāma maekwerà kō opoeratà opō'ā ky'y. <sup>17</sup>Ajaire jane nokājāive mǎe kō Janerōvijā janemonotà okoty ky'y. Yva rātasī rupi janemonotà. A'e pē rǎ'i janemoatytà aty wasu rōmō. A'e pē Janerōvijā ywete siōvaisitā ky'y. Awyje ipyri jaiko karuarutà āmē ky'y.<sup>j</sup> <sup>18</sup>Aepo a'e pejē pepy'amokasia mō. Tapejimokasi jē awi ojee peiko, a'e pejē.

### “Jesu vāea rǎ tapemoa'u jē”, e'i mǎ'ë

**5** <sup>1</sup>Āmō, kee a'e pejē, eretārāgwerà kō. Nakusiwa'ai Janerōvijā ywete vāea rǎ 'arà rewarà, manyvo remē pō, mape kwaray remē pō, nijakuwai rewarà mō. <sup>2</sup>Kee a'e pejē. Ivāea 'arà nijakuwa amātejē'ai. Āwitō imona mǎ'ë py'awarà mō pya ovāe ipi, āwīvotà Janerōvijā ywete ovāe remē.<sup>k</sup> <sup>3</sup>Kee e'i tite kupa akatu ovāetà:

<sup>j</sup> 4.17 1Kor. 15.51-52    <sup>k</sup> 5.2 Mat. 24.43-44; Ruk. 12.39-40; 1Tes. 5.2; 2Pe. 3.10; J.Jim. 3.3; 16.15-16

– Owaray jaiko ky'y! Nijanemarama'ai jaiko ky'y! Nijakyje'ai teve, e'i titetã mã'ẽ akatu ovãetã Jesu.

Ajapape wyive jimomorijau wasua poroapy'atã ky'y. Awitõ wãivĩ nimemyray pukui remẽ imemy'a kuise'ẽ jẽ, awĩvo vetã ivãea 'arã. Jane kõ nojava'ai iwyi a'evo remẽ. Naiko'ai mape kyty jajavatã nou mã'ẽ ky'y rewarã mõ nojava'ai kupa. Janerõvijã ywete ayvu noerovijai mãe kõ wapy'a ywetetã ivãea 'arã.

<sup>4</sup>Na'evõ'ai pejẽ, eretãrãgwerã kõ. Napenapy'a'ai Janerõvijã ywete vãea 'arã rã, pemoa'u jẽ peiko rewarã mõ. Ja've rõwã tapeiko e'ã. Oke mãe kõ vo tapeiko e'ã. Omã'ẽ jẽ iko mãe kõ vo tapeiko. <sup>5</sup>Aje ywete Janejare'e ayvu pekuwa mãe kõ tẽ pejẽ, pirujẽ. Ivo tekoua rupi peiko ipi. Nivoi tekoua rupi ekoi mãe kõ rõwã jane. [Ajawyi jajimotekokuwapa katu ivãea rã rẽ, noerovijai mãe kõ vo rõwã.] <sup>6</sup>A'e kõ noja'a ywe'ei tite ivãea 'arã rẽ. Oke mãe kõ vo 'ejẽ ekoi kupa. Ta'evõ e'ã ikõ jane ajamã'ẽ nẽ. Simoa'u jẽ ivãea, ikoty rewarã kõ rõmõ. <sup>7</sup>Janerõvijã ywete noerovijai mãe kõ amẽ nomoa'u ywe'ei tite ivãea 'arã kupa. Pãtõnusu rupi ekoi maevo sõ tite kupa. Oke kupa. Oka'u kupa. Notekokuwai kupa.

<sup>8</sup>Jane amẽ aryvo rupi jaiko mãe kõ tẽ. Janejare'e ayvu sikuwapa. Ajawyi simoa'u jẽ ivãea 'arã jaiko ky'y. Tijaja'a ywete jẽ Janejare'e ayvu rẽ jaiko ipi. Tijajireko katu janemoaia kõ wyi jaiko, sota vo tijaiko. Awitõ sota kõ opijaa oinõ wee ipi. Amõ, sapeu atã mã'ẽ opypy ipi, ojimokasia mõ ojireko katu apã kõ wyi. Awĩvo ve tijajimokasi ajãgai rõvijã wyi jaiko ipi. Kee jaiko. Janejare'e rẽ jajirovija remẽ, janekasi ajãgai rõvijã wyi ipi. Amõ, Janejare'e jaauvay remẽ. Amõ, Janejare'e pyri jaiko karuarua jamoa'u jẽ remẽ janekasi teve ipi.<sup>1</sup>

<sup>9</sup>Janejare'e janepyteporo remẽ, janemomorijaua rõmõ rõwã a'evõ janerereko ipi. Aje ywete wemireko katuarã kõ rõmõ janepyteporo janerereko. Janerõvijã Jesu Kiristu mãnõa rupi a'evõ janerereko, awyje ipyri tijaiko. <sup>10</sup>Janerekovijarerã rõmõ omãnõ, awisõ tijaiko karuaru ipyri. Nimanyvo'ai jamãnõma ipe remẽ ovãe remẽ. <sup>11</sup>Ajawyi tapejimokasi jẽ pejipãtavõ. Awitõ age'e, awĩvo ve jẽ tapeiko.

### Kareta moawyjepaa

<sup>12</sup>Kee oro'e tẽ pejẽ ky'y, oreretãrã kõ. Penõvijã kõ ikõ tapemomojy ipi nẽ. Janerõvijã ywete opyteporo kõ penerekoarã kõ rõmõ toiko kupa. Amõ, pemotekokuwaarã kõ rõmõ toiko kupa. <sup>13</sup>Oposiko ywete pepyterã rupi iko kupa. Ajawyi ikõ tapeau kõ imomojy kõ ipi nẽ, a'e pejẽ. Amõ, tapejimory katu teve ikõ ojee ipi nẽ.

<sup>14</sup>Amõ, kee tapejẽ nijeweri mãe kõ pẽ ipi:

– Tapeposiko katu ikõ peupe ipi nẽ, tapejẽ ijupe kõ.

<sup>1</sup> 5.8 Eps. 6.13-17



Ãmõ, okyje mæe kõ tapemokasi ereko kõ. Ijãgyo mæe kõ tapemopyte'u imokasi kõ ipi. Ãmõ, Jesu rë ojirovija a'u tẽ mæe kõ tapepãtavõ imokasi teve. A'evõ poropãtavõ peiko remẽ, mewe tẽ ojimotee mæe kõ rë tapejikõtevẽ e'ã. Mewe tẽ ojimoteetã kupa ajawyi. <sup>15</sup>Ãmõ, ava mõ sõ pemoai penereko remẽ, tapeovaja e'ã ereko ipi. Pirujẽ jane kõ tapereko katu, manyvo jẽ ekoi kupa remẽ. A'evõ kõrijõ tẽ tapeiko ipi.

<sup>16</sup>Kee ikõ peiko teve ipi nẽ. Tapepy'aory peiko ipi. <sup>17</sup>Ãmõ, tapeporegeta py'yi Janejare'e pẽ peiko ipi. <sup>18</sup>Penereko katua rë, “Nekatuay wete”, tapejẽ py'yi Janejare'e pẽ ipi. Manyvo jẽ peiko remẽ ikõ a'evõ tapeiko ipi nẽ. A'evõ Janejare'e opota tapeiko ipi, Kiristu Jesu revejẽ peiko mæe kõ rõmõ.

<sup>19</sup>Ãmõ, Janejare'e 'Ãg oporegeta pepy'a pẽ remẽ, taperovija katu ikõ ipi nẽ. Ãmẽ tẽ nopi'ãi penereko katua wyi. <sup>20</sup>Ava mõ Janejare'e 'Ãg kasia rupi pemogeta remẽ, tapejikõõ ywe'e tite e'ã ijayvu renu tare'ã mõ. <sup>21</sup>“A'evõ sipõ?” tapejẽ kõrijõ ãmẽ ipi. Peãã rãĩ ikuwa katu ãmẽ ijupe esa. Ãmẽ, aje ywete Janejare'e 'Ãg kasia rupi aepo e'i remẽ, taperovija ijayvu ãmẽ ky'y. <sup>22</sup>Tapejireko katu ivo e'ãa wyi, iteetejẽ, upi tapeiko ywe'e tite e'ã peiko ipi.

<sup>23</sup>Janepy'amopiryvypy katu mã'ẽ tẽ Janejare'e. A'e pẽ oroporegeta remẽ, kee oro'e peupewarã mõ ipi:

– Epãtavõ Tesaronika taa wãnã kõ imokasi kõ jẽ, aje ywete nekoty rewarã kõ rõmõ toiko kupa ipi, oro'e. Epy'amokasi kõ teve ipi. Ekoa kõ teremoterẽ gatu ikõ ijupe kõ ipi nẽ. Ãmẽ tẽ ojireko katutã neremimota rupi iko kupa ipi. Awivo ekoi kupa remẽ tẽ, nojav'yãi nerekoa kupa, oro'e. Ãmẽ tẽ Janerõvijã Jesu Kiristu ovãe mijẽ remẽ, noereko pe'i'ãi ivo e'ãa, oro'e peupewarã mõ ijupe ipi.

<sup>24</sup>Janejare'e pepyteporo oupewarã kõ rõmõ tapeiko ipi. Temirovija tẽ Janejare'e. Ajawyi aje ywete pemokasiaytã a'evõa rupi tapeiko.

<sup>25</sup>Kee a'e teve pejẽ, eretãrãgwerã kõ. Tapeporegeta ikõ Janejare'e pẽ oreupewarã mõ teve ipi nẽ.

<sup>26</sup>Ãmõ, pejirovãe remẽ upi upi, tapejimory katu ikõ ojee Jesu koty rewarã kõ rõmõ ipi nẽ.

<sup>27</sup>Aã eremikusiwarerã ikõ tapemogeta pirujẽ Jesu rë ojirovija mæe kõ pẽ nẽ, Janerõvijã ywete ayvu rupi akusiwa ajupa pejẽ rewarã mõ.

<sup>28</sup>Janerõvijã Jesu Kiristu ikõ tapenereko katu ikõ okatuaya rupi nẽ. [Awyjepa ãmẽ eremikusiwarerã ky'y.]